

## كَبَل ميعاد البعاد آه يا مگسى الوداع

تاج للعصمة وإلهه بالإمامة نصّباه  
حامت اعليه المنيه وابنه الباقر إجاه  
دمعه فايض بالهموم  
آه يا مگسى الوداع

يهمس أنه امحمد ابنك جاي وبصدي الحنين  
بويه الله اعظم اجرّك في مصابك بالحسين  
والمحمن متواصله  
آه يا مگسى الوداع

بيني تدري هالفجعة ذوبت كلب البتول  
اذكر اجساد الهواشم تسحگ اعليها الخيول  
واذكر صياح الحرم  
آه يا مگسى الوداع

اذكرك ظامي يولدي وكأبي لحوالك وجيع  
و من وكع من بعده جدك يسبح بموج النجيع  
شردونا امن الوطن  
آه يا مگسى الوداع

يحيدي بيها كل دعية و هيّة من آل النبي  
وتدخل بمجلس شماتة شامخ ابّه الناصبي  
يضرب ابّراس الحسين  
آه يا مگسى الوداع

بيني يا الباقر امانة الدين شيّد به الصروح  
وصّل الشيعتنا واجب تندب احسين وتنوح  
صاح يا الباقر سلام  
آه يا مگسى الوداع

## الباقر وزين العباد قمرين باجتماع

حجة المعبود وارث كل مواريث الإله  
جيف إبليس ابسمومه فت جبدته وتعباه  
شافه ناحل بالسموم  
صاح يا زين الطباع

يمه كاعد يجري دمعه ويلثمه فوگ الجبين  
يلنذرت أيام عمرك للمدامع والونين  
فتتنا كرباله  
زيـدتنا إفتجاع

شال طرفه الدامع ابهم ينظر الباقر يگول  
يوم واحد تصفى عترة أحمد الهادي الرسول  
طاح عالشاطي العلم  
جرحي بيني باتساع

باقر اعلمو الرسالة بيوم عاشور الفجيع  
من نظرت احسين راجع بيده مذبوح الرضيع  
شلون انسى هالمحن  
نار زادت اندلاع

بيني من انظر لزينب اذكر احوال السبي  
اتصير فرجة يا وسافة للمعادي الاجنبي  
يشتم الهادي الامين  
تعبت بهذا الضياع

خذ مقاليد الإمامة وخذ دموعي والجروح  
للهداية اعلى البريه وفيض علمك يا سموح  
مدد ايدينه الامام  
غمض بحين النزاع